



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Sumáriu Atividade Mensál

Observasaun ba Parlamentu Nasionál

Juñu 2021

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77040735
www.jsmp.tl
info@jsmp.tl
Facebook: www.facebook.com/timorleste.jsmp
Twitter: @JSMPtl

Tabela Konteúdu

Introdusaun	3
A. Reuniaun Plenaria	4
1) 07 Juñu 2021	4
2) 14 Juñu 2021	7
3) 21 Juñu 2021	7
4) 22 Juñu 2021	8
5) 28 Juñu 2021	9
6) 29 Juñu 2021	12
B. Reuniaun Komisaun A	14
1) 01 Juñu 2021	14
2) 02 Juñu 2021	16
3) 04 Juñu 2021	17
4) 08 Juñu 2021	18
5) 09 Juñu 2021	19
6) 10 Juñu 2021	22
7) 16 Juñu 2021	23
8) 23 to'o 26 Juñu 2021	23
Konklusaun no Rekomendasaun	24

Introdusaun

Iha fulan Juñu 2021, JSMP kontinua halo monitorizasaun bá atividade reuniaun plenária no reuniaun Komisaun A.

Iha monitorizasaun ne'e, JSMP nota katak, Parlamentu Nasionál konsege halo diskusaun no aprovasaun ba pakote lei sira mak hanesan *Proposta de Lei Nú.30/V (3ª) - Terceira Alteração à Lei Nú.5/2006, de 28 de dezembro, sobre Órgãos da Administração Eleitoral, da proposta de Lei Nú. 31/V (3ª) - Primeira Alteração à Lei Nú.6/2016, de 25 de maio, Lei do Recenseamento Eleitoral e da proposta de Lei 33/V (3ª) - Sexta Alteração à Lei Nú.7/2006, de 28 de dezembro, Lei Eleitoral para o Presidente da República.*

Parlamentu Nasionál mós halo aprovasaun bá projetu no proposta lei sira seluk hanesan *Proposta de Lei Nú.28/V(3ª) - Organização e Funcionamento dos Tribunais, Proposta de Lei Nú.24/V(3ª)- Estatuto do Ministério Público. Projeto Lei 3 mak hanesan projetu de Lei Nú.19/V(3ª) - Organização Judiciária, Projeto de Lei Nú.23/V(3ª)- Estatuto do Ministério Público no Projeto de Lei Nú.21/V(3ª)-Estatuto do Magistrado Judiciais.*

Depoisde halo aprovasaun, Meza Parlamentu baixa hikas lei hirak ne'e ba iha Komisaun A hodi halo diskusaun iha espezialidade.

Alende halo diskusaun no aprovasaun ba proposta no projetu lei sira, Parlamentu Nasionál mós realiza reuniaun plenária extraordinária ida hodi halo renovasaun ba Estado Emerjénsia ba XV iha território nasional tomak, durante loron 30, hahú husi loron 2 fulan Jullu 00:00 to'o loron 31 Jullu 2021.

A. Reuniaun Plenaria

Iha fulan Juñu nia laran, Parlamentu Nasionál konsege halo reuniaun plenária hamutuk dalan neen. Iha reuniaun sira ne'e, Parlamentu Nasionál konsege aprova proposta lei hamutuk lima no projetu lei hamutuk rua ho nia detallu hanesan tuir mai ne'e:

1) 07 Juñu 2021

Reuniaun plenária iha 7 Juñu 2021 ho ajenda diskusaun mak hanesan tuir mai ne'e:

Ajenda *antes ordem do dia* mak:

- Anunsia husi meza ba retorna mandatu husi deputada Josefa Alves Pereira Soares.
- Apresenta Relatório Komisaun Infraestrutura relativamente kona-ba vizita traballu ba Munisípiu Vikeke no Manufahi.
- Deklarasaun Política bankada Parlamentares.
- Informasaun señor Ministru Asuntu Parlamentár no Komunikasaun Sosiál.

Laiha ajenda ba *período ordem dia*

Apresenta Relatório Komisaun E

Iha apresenta Relatório Komisaun E ne'ebé kaer Asuntu Infraestrutura nian relativamente kona-ba vizita traballu fiskalizasaun ba Munisípiu Vikeke no Manufahi, ne'ebé apresenta husi deputada relatór Sra. Maria Anabela Savio ne'ebé prezide husi Prezidente Komisaun A, Sr. Deputadu Abel Pires da Silva PhD.

Fiskalizasaun ba Munisípiu Vikeke

Iha vizita traballu fiskalizasaun ba Munisípiu Vikeke deputadu sira deskobre asuntu sira mak hanesan projetu sira balun konklui ona, maibé seidak iha pagamentu, estrada no ponte sira iha Vikeke aat liga ba Postu Administrativu sira no suku no inklui mós prepagu ne'ebé iha uza de'it iha postu villa, edifísiu DNTT laiha, sistema protokolu la la'o, Postu Administrasaun Natarbora aat, projetu estrada rurál balun paradu no postu sira seluk sei nafatin uza prepagu uluk hodi labele selu eletridade no libre uza nune'e mós eletridade iha suku no aldeia sira balun mak seidak asesu no pesoál voluntáriu sira ne'ebé halo serbisu iha tinan barak ona seidak hetan kontratu fiksi.

Rekomendasaun sira mak hanesan:

- Husu ba Governu atu halo rekonstrusaun ba ponte sira ne'ebé aat ona.
- Presiza melora serbisu protokolu iha munisípiu.
- MOP atu kontinua fó apoiu ba rehabilitasaun estrada rurál sira no fó kontratu ba funsionáriu voluntáriu.
- Rekomenda ba ANE, ep. (EDTL) atu instala liña eletridade no prepagu sira.

- Ba Ministériu Transporte atu instala edifisiu iha Vikeke no fó kontratu ba funcionáriu voluntáriu.

Fiskalizasaun ba Munisípiu Manufahi

Iha vizita fiskalizasaun ba Munisípiu Manufahi deputadu sira deskobre katak maioria projetu rurál atinje ona 100%, projetu 4 mak uza OJE 2020 seidauk hotu tanba problema orsamentu no Covid-19, kontadór iha no uza iha munisípiu vila de'it no postu seluk seidauk uza, hela suku 15 mak seidauk asesu eletrisidade, funcionáriu EDTL sei konfuzau ho transformasaun ba empresa públiku, menus fasilidade iha serbisu bee no saniamentu, diresaun transporte laiha veíkulu no voluntáriu sira serbisu durante tina 5 seidauk iha kontratu.

Rekomendasaun sira mak:

- Governu tenke mantein investimentu ba finansia ba infraestrutura no halo manutensaun no rehabilitasaun.
- Tenke iha sistema komunikasaun ba halo kontrolu no supervizaun ba projetu sira.
- Sutroidade Eletrisidade EP instala prepagu no dada liña eletrisidade ba suku ne'ebé seidauk hetan asesu, nune'e mós fó kontratu ba voluntáriu sira.
- Governu tenke fornese fasilidade ba bee no saniamentu atu fasilita sira-nia serbisu hodi fornese bee moos ba comunidade sira, inklui mós aplika kustu tarifáriu ba bee moos sira.
- Husu Governu atu halo avaliasaun ba funcionáriu sira hodi halo promosaun tuir estatutu.

Iha apresisaun ba relatóriu Komisaun nian, deputadu sira apresia ho deskobrimentu sira ne'ebé Komisaun E hetan no husu ba Governu atu bele tau iha konsiderasaun ba rekomendasaun sira ne'ebé Komisaun E mensiona iha sira nia relatóriu.

Deklarasaun política bankada KHUNTO

Iha sira-nia deklarasaun, hato'o sentidu kondolénsia no kondena aktu brutalizmu husi oknum PNTL ne'ebé tiru mate ema na'in rua aman ho oan no rezulta ema ida kanek todan iha suku Lahane, Aldeia Ainitas Hun. Sira husu ba autoridade competente sira hanesan Ministériu Públiku nu'udar titulár ba asaun penál, Polisia Sientífiku Investigasaun Kriminál (PCIC) no PNTL halo prosesu ba kazu ne'e ho sériu no justu tuir justisa Timor-Leste nian.

Intervensaun diversu

Iha intervensaun, deputadu sira hato'o preokupsaun sira kona-ba:

- Akontesimentu kazu Lahane Aldeia Ainitas Hun no deputadu sira kondena no husu ba Ministériu Públiku no polisia atu prosesa kazu ne'e ho rigór tuir dalan justisa.
- Husu mós ba Governu atu reforma instituisaun PNTL.
- Husu atu Ministériu Saúde labele haree de'it problema Covid-19, maibé haree mós moras sira seluk no oinsa atu halo tranferénsia no tratamentu.
- Aplikasaun serka sanitária tenke rigór se lae husik povu livre atu halo nia atividade tanba ema seluk la halo tuir ka kumpri regra sira ne'e.
- Husu atu Governu bele sériu ba haree eroi sira ne'ebé lakon.
- Husu ba KAK atu halo investigasaun ba projetu dalan Watulari ba Kelikai ne'ebé Estadu lakon osan barak, maibé rezultadu laiha no projetu ne'e hala'o husi kompañia Karakuta Unipessoal Lda ho montante tokon ida (1) Dolar Amerikanu.
- Husu ba Governu atu haree hadi'a prosedimentu seluk kona-ba *swab* ne'ebé to'o loron tolu.
- Hadi'a akordu ho ró foun tanba kualidade la di'ak no tenke husu ró na'in nia responsabilidade kuandu ró aat.
- Husu atu dada eletrisidade ba suku ne'ebé seidak asesu no tau ona prepagu ba ema hotu hodi bele selu atu fó reseita ba Estadu.
- Husu mós atu rezolve funsionáriu kontratadu sira ne'ebé tinan barak serbisu laiha progresu atu rezolve sira-nia destinu.
- Husu atu halo akordu importasaun entre Indonesia ho Timor-Leste sobre sosa veíkulu sira.

Resposta Governu nian

Hatan ba preokupasaun sira ne'e, Ministru MAPKOM haktuir katak nia parte kondena maka'as aktu brutalizmu ne'ebé akontese iha Lahane no kontinua husu ba autoridade judisiál no polisia atu halo prosesu tantu justisa nian no medida sira seluk ne'ebé apropiadu no tanba ne'e agora dadaun suspeitu derzarmadu no submete ona ba prosesu sira justisa nian.

Enkuantu kona-ba informasaun sira seluk, nia parte sei relata ba ministériu relevante sira no Governu, relasiona ho kazu ema lakon nia parte hato'o ona ba Governu atu fó resposta, kona-ba tratamentu saúde nia sei enkamina ba Ministériu Saúde, SWAP tuir loloos oras 24 de'it, maibé ne'e sei hare filafali tanba sa akontese to'o loron tolu.

Entretantu kona-ba eletrisidade tuir planu ba tinan ida ne'e sei realiza iha suku 32 no ida ne'e nia prosesu tenderizasaun hotu ona no agora faze kontratu, nune'e mós instalasaun ba prepagu ANEL, Ep sei hala'o ida ne'e iha tinan ida ne'e tuir nia planu hodi bele asegura reseitas ba Estadu.

2) 14 Juñu 2021

Iha 14 Juñu 2021, Parlamentu Nasionál debate ho Governu kona-ba estratejia kombate Covid-19 iha Timor-Leste. Durante diskusaun, deputadu sira preokupa liu kona-ba medida prevensaun sira no progresu vasina ba sidadaun sira durante ne'e. Tuir deputadu sira katak iha difikuldade barak ne'ebé Governu preziza rezolve, nune'e Covid-19 la bele da'et ba ema seluk. Governu preziza halo kontrolu ne'ebé rigorozu ba fatin públiku no fatin izolamentu sira ne'ebé mak destaka ona.

Governu rekoñese iha difikuldade barak duni iha parte medida prevensaun nia, maibé ho kondisaun ne'ebé mak iha Governu kontinua esforsu hodi halo prevensaun no kombate Covid-19. Parte Saúde nian mós kontinua halo observasaun no halo akompañamentu ba izolamentu sira no halo sosializasaun ba públiku atu bele halo prevensaun no kombate virus refere. Prosesu vasina iha TL mós kontinua la'o hela no komuidade barak iha konsensia rasik hodi tuir ona vasina iha Sentru Saúde sira ne'ebé destakadu.

3) 21 Juñu 2021

Iha sesaun plenária, 21 Juñu 2021, Parlamentu Nasionál halo diskusaun no aprovasaun iha jeneralidade ba pakote lei 3 mak hanesan *Proposta de Lei Nú.30/V (3ª) - Terceira Alteração à Lei Nú.5/2006, de 28 de dezembro, sobre Orgãos da Administração Eleitoral, da proposta de Lei Nú.31/V (3ª) - Primeira Alteração à Lei Nú.6/2016, de 25 de maio, Lei do Recenseamento Eleitoral e da proposta de Lei 33/V (3ª) - Sexta Alteração à Lei Nú.7/2006, de 28 de dezembro, Lei Eleitoral para o Presidente da República.*

Depoisde halo aprovasaun, plenária entrega hikas lei tolu ne'e ba iha Komisaun A hodi halo diskusaun iha especialidade. Proposta lei sira ne'e halo aprovasaun ketak ketak maibé hetan rezultadu ne'ebé hanesan ho votu afavór 36, kontra 0 no abstensaun 15. Autorizasaun ba Komisaun A hodi kontinua diskusaun iha especialidade ba lei tolu ne'e aprova ho votus afavór 46, kontra 0 no abstensaun 4.

Meza mós baixa ona ba Komisaun A no F *Projeto de Lei Nú. 29/V (3ª) - Lei de Proteção a Crianças e Jovens em Perigo.* Prazu ba Komisaun A no F atu halo apresiasaun ba projetu ne'e loron 20.

Iha períodu *antes ordem do dia*, PN mós halo votu saudasaun ba Dr. Antonio Guterres ne'ebé reeleitu hanesan Sekretáriu Jerál ba Organizasaun Nasoens Unidas.

Hafoin ida-ne'e bankada CNRT liuhusi deputadu Domingos Carvalho halo deklarasaun política kona-ba aluga ró-ahi KMB TRANSHIP II husi Ministru Transporte no Komunikaun ne'ebé mak Primeiru Ministru ho nia komitiva uza ba Atauro iha 11 Juñu

2021. Iha deklarasaun ne'e, CNRT deklarata katak iha indisíu forte ba korrupsaun ne'ebé Ministru Transporte no Komunikaun, Jose Agostinho da Silva komete.

Tuir deputadu ne'e katak antes ró ahi ne'e halo nia operasaun mosu ona reasaun maka'as husi públiku, liuliu Komisaun E no FONGTL ne'ebé ejize ba Komisaun Anti Korrupsaun KAK no Ministériu Públiku atu halo investigasaun ba prosesu kontratasauun ró-ahi refere.

Intervensaun diversu

Iha intervensaun diversu, deputada Lidia Norberta levanta kestaun sira kona-ba kandidatu traballadór sira ne'ebé ba Korea Sul ne'ebé tuir teste PCR, na'in lima pozitivu no la bele kontinua sira-nia viajen ba Korea, tanba ne'e husu ba SEFOPE atu aseguara sira-nia naran iha lista ba períodu sira tuir mai.

Deputada Olinda Guterres preokupa kona-ba comunidade iha Hera ne'ebé durante ne'e la asesu ba bee moos. Deputada ne'e mós diskorda ho deklarasaun bankada CNRT katak bankada KHUNTO hetan asentu parlamentár ho nia kadeira 5 iha PN maibé seidauk halo korrupsaun boot hanesan CNRT dehan. Deputada Veneranda Lemos levanta kestaun kona-ba eletrisidade ne'ebé mate lakan iha Atauro.

Hatán ba deklarasaun bankada CNRT nian, Ministru ba Asuntu Parlamentár no Komunikaun hateten kestaun hirak ne'e sei rezolve tuir dalan polítika no tuir lei. Kestaun kona-ba ahi lakan mate iha Atauro ne'e sei responsabliza husi EDTL rasik tanba EDTL sai ona empreza públika.

4) 22 Juñu 2021

Iha sesaun plenária, 22 Juñu 2021, Parlamentu Nasionál halo aprovasaun iha jeneralidade ba proposta lei 2 no projetu lei 3. Proposta Lei 2 ne'e mak hanesan *Proposta de Lei Nú.28/V(3ª) Organização e Funcionamento dos Tribunais, Proposta de Lei Nú.24/V(3ª) - Estatuto do Ministériu Público*. Projetu lei 3 mak hanesan *Projeto de Lei Nú.19/V (3ª) - Organização Judiciaria, Projeto de Lei Nú.23/V(3ª) - Estatuto do Ministériu Público no Projeto de Lei Nú. 21/V(3ª) - Estatuto do Magistrado Judiciais*.

Iha diskusaun no votasaun ne'e, proposta ne'ebé mai husi Governu nia materia hanesan ho projetu ne'ebé prepara husi deputadu sira, nune'e Meza foti desizaun hodi halo hotu aprovasaun ba diploma rua no iha especialidade mak halo fali textu substitutivu hodi halo harmonizasaun.

Iha *período antes ordem do dia*, bankada KHUNTO halo deklarasaun polítika kona-ba notísia ne'ebé fó sai husi televizaun GMN-TV relaciona ho deklarasaun Austrália nian kona-ba aimoruk vasina Astra Zaneca (AZ) ne'e fó de'it ba ema ho idade 60, ho ida-

ne'e bankada KHUNTO husu Ministériu Saúde atu klarifika informasaun ne'e ba públiku.

Iha mós deklarasaun husi bankada PD nian husu klarifikasaun husi MNEC ba votu abstensaun TL nian ba situasaun iha nasaun Myanmar nian.

Intervensaun diversu

Iha intervensaun deputadu sira hato'o preokupasaun kona-ba notisia GMN-TV nian relasiona ho aimoruk vasina AZ ne'ebé Austrália sira fó sai katak AZ ne'e bele fó de'it ba ema ho idade 60 ba leten, bazeia ba informasaun ne'e husu ba Ministériu Saúde, OMS hodi halo klarifikasaun loloos ba públiku.

Kestaun sira seluk mak kona ba asesu be'e mós, estrada, *zebra kros* no lampu trázitu sira ne'ebé la funsiona inklui rekrutamentu ba profesór foun sira.

Hatán ba preokupasaun hirak ne'e, Ministru Asuntu Parlamentár no Komunikasaun hateten Governu sei disponivel hamutuk ho WHO hodi halo klarifikasaun.

Relasiona ho kestaun Estadu RDTL votu abstensaun ba situasaun iha nasaun Myanmar nian, Ministru hatan katak MNEC hato'o ona komunikadu ofisiál ba públiku.

Rekrutamentu ba profesór foun sira, governante ne'e hateten sei rekruta uluk profesór kontratadu sira ba permanente hafoin rekruta sira ne'ebé foun.

Kestaun seluk ne'ebé Governu seidak responde sei entrega ba Ministériu relevante sira hodi responde iha tempu tuir mai.

5) 28 Juñu 2021

Ajenda reuniaun plenária iha 28 Juñu 2021 nian hanesan tuir mai ne'e:

- Lee pedidu justifikasaun falta husi deputadu Orca de Araujo.
- Deklarasaun política bankada KHUNTO.
- Intervensaun deputadu sira-nian.
- Informasaun husi señor Ministru Asuntu Parlamentár kona-ba kestaun sira ne'ebé deputadu sira solisita.
- Diskusaun no aprovasaun iha finál globál ba proposta Lei Nú.30/V (3ª) Alterasaun ba Lei Nú.5/2006, 28 Dezembru, kona-ba Órgaun Administrsaun Eleitorál.
- Diskusaun no Aprovasaun iha finál globál ba Proposta Lei Nú.31/V (3ª) Alterasaun dahuluk ba Lei Nú.6/2016, 25 Maiu, kona-ba Lei Resensiamentu Eleitorál.

- Diskusaun no aprovasaun iha finál globál ba Proposta Lei Nú. 30/V (3^a) Sexta Alterasaun ba Lei Nú.7/2006, 28 Dezembru, kona-ba Lei ELeitorál ba Prezidente Repúblika.

Deklarasaun polítika KHUNTO

Iha Partidu KNHTO nia deklarasaun polítika, husu ba líder partidu polítiku sira ne'ebé hetan asentu iha Parlamentu Nasionál no mós líder istóriku sira atu tur hamutuk hodi bele rezolve problema rai-laran liuliu atu haree ba desenvolvimentu ne'ebé agora la'ó ladun di'ak no povu barak hein hela atu nune'e bele hadi'a Timor-Leste sai di'ak liután iha futuru.

Partidu KNHTO mós husu ba povu atu fó apoiu másimu ba kualkér desizaun ne'ebé Partidu KNHTO foti iha Parlamentu no Governu ida ne'e.

Intervensaun diversu

Iha intevensaun diversu husi deputadu sira-nian, deputadu sira kestiona kona-ba asuntu sira mak hanesan:

- Informasaun sira kona-ba vasina nian ba comunidade atu hatene hodi partisipa no mós liuliu liga ba risku sira no número partisipasaun comunidade hodi halo vasina.
- Tanba saida mak ezekusaun fundu Covid-19 foin mak atinje porsentu 24% no mós tanba saida ezekusaun orsamentu jerál estadu foin mak atinje porsentu 32%.
- Tanba saida mak to'ó agora subsidiu ba estudante sira la la'ó ne'e oinsa inklui prosesu pagamentu ba kompañia fonesedór hahan ba sala izolamentu, karantina no seluk tan seidak la'ó no mós programa sesta báziku no liña frente sira seidak hetan subsidiu.
- Tanbasá atu hasai programa Governu tenke konsulta ho UPMA.
- Husu Governu atu bolu antensaun ba Embaixada Indonezia iha Timor relasiona ho Ró ilegal husi Custome Indonezia tama Atauro maibé laiha prosesu.
- Pagamentu retroativu ba profesór sira.
- Husu mós atu hadi'a fatin turístiku sira iha Timor laran ne'ebé hetan estragus husi inundasaun no ema ne'ebé to'ó agora seidak iha kondisaun.
- Hadi'a estrada kapitál munisípiu sira no hadi'a igreja Aimutin.

Resposta Governu

- Sei enkamina preokupasaun sira ne'ebé deputadu sira solisita ba membru Governu sira inklui instituisaun Estadu revelante sira atu hatan pur eskrita no karik hatan tarde ministru haktuir katak husu ba deputadu sira atu halo karta

audéncia direta ho ministru no instituisaun relevante sira hodi bele hatan direta mai iha plenária ida ne'e iha debate.

- Ministru mós haktuir katak iha problema balun ne'ebé nia bele hato'o iha Konsellu Ministru atu diskute liuliu liga ho ró ilegál tama mai iha Atauro no Oekusi hodi buka solusaun.
- Kona-ba ezekusaun orsamentu fundu Covid-19 nian ne'e iha faze prosesu averiguasaun ba dadus sira hodi bele halo pagamentu ba ema hirak ne'ebé tuir Dekretu Lei Fundu Covid nian iha direitu ba, tantu estudante, liña frente no ba kompañia sira hodi bele kompleta sira-nia direitu hetan fundu ida ne'e. Ezekusaun OJE nian sei la'o hela no Governu halo ona komitmentu ba projetu foun sira no ida ne'e iha ona faze prosesu konstrusaun ba projetu foun sira no balun iha ona faze finalizasaun hodi Governu bele kompleta nia pagamentu.
- Kona-ba muda programa tenke komunika ho UPMA ne'e tanba tenke bazeia ba sistema ne'ebé estabelese ona ho lei no ida ne'e kabe ba kompeténsia UPMA nian inklui ho Ministra Finansas.
- Kona-ba taxa partisipasaun comunidade sira nian ba vasina kontinua sa'e maski sei iha balun iha hela dúvida tanba ne'e Governu kontinua alerta hodi enkoraja povu sira atu bele ba vasina.
- Vasina Astrazaneca nia informasaun ne'ebé espallada la loos no tanba ne'e Governu mantein uza atu halo vasina ba comunidade ne'ebé hakarak atu halo vasina hodi nia bele livre halo movimentu ba mai.

Ajenda ordem do dia

Deputadu sira iha ajenda *ordem do dia* aprova mós lei sira mak hanesan tuir mai ne'e:

Diskusaun no Aprovasaun iha finál global ba proposta Lei Nú.30/V(3^a) Alterasaun ba Lei Nú.5/2006, 28 Dezembru, kona-ba Órgaun Administrsaun Eleitorál. Iha nia rezultadu aprovasaun aprova ho votu a favor 62, kontra 0 no abstein 0 husi total deputadu na'in 62.

Diskusaun no Aprovasaun iha finál global ba Proposta Lei Nú.31/V(3^a) Alterasaun dahuluk ba Lei Nú.6/2016, 25 Maiu, kona-ba Lei Resensiamentu Eleitorál. Iha nia rezultadu aprovasaun aprova ho votu a favor 62, kontra 0 no abstein 0 husi total deputadu na'in 62.

Diskusaun no aprovasaun iha finál global ba Proposta Lei Nú.30/V(3^a) Sexta Alterasaun ba Lei Nú.7/2006, 28 Dezembru, kona-ba Lei Eleitorál Presidente República. Iha nia rezultadu aprovasaun aprova ho votu a favor 62, kontra 0 no abstein 0 husi total deputadu na'in 62.

Deputadu Francisco Vasconselhos mós halo rekursu hodi propoin proposta foun atu elimina alinea a), d) no e) Artigu 5 kona-ba kompozisaun no nomeasaun membru sira CNE husi Prezidente Repúblika, Tribunál no Ministériu Públiku iha Lei Órgaun Administrsaun Eleitorál, ne'ebé iha nia justifikasaun ba proposta ne'e haktuir katak nomesaun komisáriu CNE husi Prezidente Repúblika nian kontra Konstituisaun Artigu 85 no 86 tanba la prevee, nune'e, di'ak liu atu hasai tiha ida ne'e tanba la estipula iha Konstituisaun. Enkuantu tribunál iha nia justifikasaun tanba tribunál nu'udar órgaun soberania ho nia rekursu ne'ebé limitadu no nia mak sei halo desizaun ba kualkér fraude iha elisaun sira.

Ho razaun sira ne'e, deputadu ne'e husu atu labele fó serbisu barak ba tribunál no labele hamosu konfliktu interese bele hasai tiha ida ne'e. Deputadu sira haktuir tan katak iha kazu ona iha MP ba sira ne'ebé nomeadu husi ne'ebá sai komisáriu no iha ikus tenke rezigna-an tanba laiha baze legal (estatutu MP nian). Preokupasaun seluk, ema ne'ebé substitui tenke abandona nia serbisu prinsipál nu'udar prokuradór atu prosesa kazu sira ne'ebé pertense ba nia serbisu no fin tenke simu suspensaun.

Maski iha justifikasaun ne'ebé klaru no fundamenta husi deputadu CNRT sira, maibé la hetan apoiu husi Bankada Fretilin, PD no KHUNTO tanba ne'e iha votasaun la pasa ho nia rezultadu votasaun afavór 30, kontra 32 no abstein 0.

Entretantu kona-ba alinia 3) Artigu 38 ne'ebé deputadu Komisaun A sira elimina ligadu ho produsaun buletin votu Braille hetan lamentasaun no krítika husi deputadu Elvina Souza ne'ebé haktuir katak tuir loloos alinea 3) labele elimina tanba durante ne'e comunidade ema ho deficiente matan halo advokasia hodi luta hela ba direitu ida ne'e atu fasilita sira hodi bele ezerse sira-nia direitu ida sufrájiu ho di'ak sein iha *perantara* ruma atu fasilita sira iha eleisaun hodi tu fodik sira nia votu.

Deputada ne'e apresenta mós justifikasaun ho número totál ema ho defisiénsia matan iha Timor laran tomak mazumenus rihun 40 ne'ebé rejistradu iha sira-nia organizasaun rasik. Informasaun sira ne'ebé deputada Elvina apresenta iha PN kona-ba ba bullentin votu *braille* ba ema ho deficiente sira ne'e, JSMP mak fornese ba nia hodi apresenta iha reuniaun plenária antes halo aprovasaun ba Lei Eleisaun Prezidensiál.

6) 29 Juñu 2021

Iha sesaun plenária 29 Juñu 2021, Provedoria Direitu Umanu no Justisa (PDHJ) apresenta relatóriu anuál PDHJ 2020 nian ba iha Parlamentu Nasionál.

Konteúdu husi relatóriu anuál 2020 ne'e, kompostu husi área prioridade no estratéjika haat (4) PDHJ nian mak hanesan tuir mai ne'e;

1. Asegura autoridade pública iha koñesimentu di'ak kona ba direitu umanu no governasaun di'ak.
2. Garante autoridade sira bele halo prevensaun no koresaun ba violasaun prinsípiu sira direitu umanu no governasaun di'ak;
3. Ema vulneravel sira iha protesauñ hasoru abuzu direitu umanu no bele hetan asesu di'ak ba atendimentu públiku ne'ebé di'ak;
4. Asegura PDHJ nia kapasidade no independénsia hodi garante nia implementasaun ba nia mandatu ho di'ak.

Husi prióridade estratéjika haat ne'e, konkretiza ba iha objetu estratéjika importante haat;

1. Treinamentu kona-ba direitu umanu no governasaun di'ak;
2. Simu kesar no investigasaun ba kazu sira kona-ba violasaun direitu umanu no prinsípiu governasaun di'ak;
3. Fiskalizaun no rekomedasaun ba instituisaun pública sira;
4. Governasaun di'ak no jestaun institusionál.

Objetivu estratéjiku sira ne'e hatuur iha atividade sira hamutuk 96 ne'ebé ezekuta tuir mandatu PDHJ nian. Atividade hotu-hotu ne'ebé implementa husi PDHJ hodi atinje objetivu fundamentál ne'ebé proteze no promove diretu umanu no promosaun governasaun di'ak.

Tanba ne'e iha nia atendimentu ba públiku, PDHJ buka atu dezenvolve no mellora di'ak liután nia vizaun no misaun serbisu ne'ebé define ona iha ninia estatutu orgániku.

Objetivu estratéjiku ne'ebé mak fixadu ba períodu tinan 10 komesa husi tinan 2011-2020 mak hanesan tuir mai;

1. Asegura katak autoridade pública sira iha koñesimentu ne'ebé di'ak kona-ba direitu umanu no governasaun di'ak iha nivel institusionál;
2. Hasa'e Estadu nia kumprimentu ba direitu umanu no governasaun di'ak nia prinsípiu sira;
3. Asegura kapasidade independénsia PDHJ, hodi garante PDHJ bele implementa mandatu ho di'ak;
4. Grupu vulnerável sira iha protesauñ hasoru abuzu direitu umanu no bele hetan asesu ba atendimentu públiku ho di'ak.

Objetivu estratéjiku haat ne'ebé mensiona iha leten ne'e mak guia PDHJ hodi halo planu anuál no planu orsamentu hodi sai hanesan prióridade instituisaun nian iha nia programa, sub-programa no atividade sira.

Vizaun husi PDHJ nian mak proteze diretu umanu, hametin integridade no promove governasaun di'ak iha TL. Misaun PDHJ nu'udar instituisaun nasionál Timor- Leste nian, órgaun independente ne'ebé harii atu proteze direitu umanu no promove boa-governasaun liuhusi; edukasaun, promove kooperasaun, rezolusaun, investigasaun peskiza no monitorizasaun.

B. Reuniaun Komisaun A

Komisaun A Parlamentu Nasionál iha Juñu 2021 nia laran halo reuniaun hamutuk dala 11, inklui atividade diskusaun iha especialidade ba lei sira iha munisípiu Aileu durante lora haat.

1) 01 Juñu 2021

Reuniaun Komisaun A Parlamentu Nasionál iha 01 Juñu 2021 ho agenda mak hanesan tuir mai ne'e:

- Audénsia Públiku entre Komisaun A ho MAEOT, CNE, STAE no Autoridade munisipál sira husi minisipiu Dili ba projetu Lei Podér Lokál no Desentralizasaun Administrativa no esbosu Lei Eleitorál Assembleia Munisipál.
- Aprovasaun redasaun finál ba Lei Divizaun Administrasaun Teritorial.

Iha audénsia ho Ministru Administrasaun Estatal (MAE), Dr. Miguel Pereira de Carvalho haktuir katak nia parte haree konteúdu husi lei ne'e di'ak ona, maibé prezisa atu hadi'a buat balun mak hanesan artigu balun ligadu ho asuntu sira ne'ebé Prezidente Repúblika veta liga ho kompeténsia sira ne'ebé Governu Sentrálu atu delega ba iha munisípiu sira. Alende ne'e, kestaun preparativu sira ligadu ho rekursu umanu no materiál sira ne'ebé bele suporta implementasaun prosesu desentralizasaun munisipál ne'e rasik duarante ne'e to'o iha ne'ebé ona.

Ministru ne'e esplika katak nasaun unitária hanesan Timor-Leste, desentralizasaun ne'e atu fahe kompeténsia Governu Setral ba Munisípiu sira la'ós podér hanesan Indonesia nian dehan *UU Pemerintahan Daerah* nian no nia konteúdu la hanesan Timor-Leste nian no tanba ne'e iha kompeténsia balun tenke limite husi Governu Sentrálu.

Relasiona ho preparasaun husi munisípiu sira-nian atu simu desentralizasaun, munisípiu nia parte haktuir katak deskonsentrasaun ba munisípiu balun la'o ona no hein avaliasaun husi Ministériu no se lei ne'e aprova automatikamente munisípiu hirak ne'ebé durante ne'e tama iha programa pre-deskonsentrasaun sei submete ba eleisaun munisipál.

Kestaun kona-ba provizaun pontu 2) Artigu 50 ne'ebé ko'alia kona-ba designasaun veteranu sira, ministru haktuir katak ne'e kompeténsia deputadu sira atu deside no tuir

nia bele envolve sira iha konsellu de'it no se sira envolve iha deputadu tenke mós iha regra ketak atu limita sira.

Entretantu kona-ba kompeténsia sira ne'ebé regula iha provizaun Artigu 33 no Artigu 34 ne'e, tuir ministru, ne'e loos ona no prenxe rekezitu sira ne'ebé regula iha Lei Nu.3/2016 ne'ebé define ona kona-ba Estatutu Administradór Munisipál, Autoridade Munisipál no Grupu Tékniku Interministeriál ba Desentralizasaun Administrativa.

Iha parte CNE ho STAE apresenta de'it sira nia perspetiva kona-ba modelu eleisaun ne'ebé sira subliña iha lei ne'e liuliu ligadu ho bareira 3% nian no ne'e adekuaudu no tuir sistema *Hond* ne'ebé Timor-Leste uza durante ne'e. Sira mós haktuir katak prontu atu implementa lei ne'e se wainhira aprova ona no hetan promulgasaun husi Prezidente Repúblika.

Kestaun seluk ne'ebé sira kolak mak labele halo ho simultaneamente iha teritóriu nasionál tomak, maibé halo de'it iha munisípiu ne'ebé prontu ona no simultaneamente eleisaun ne'e halo ba hili Prezidente Munisípiu ho deputadu assembleia munisípiu dala ida de'it.

Iha apresentasaun Prezidente Autoridade Munisipál Dili ho nia estrutura sira ne'ebé kompostu husi administradór postu na'in 6 mak hanesan Ataúro, Cristo Rei, Dom Aleixo, Nain Feto, Metinaro no Vera Cruz, haktuir katak nia parte prontu ona atu simu delegasaun podér husi Governu sentráal no durante ne'e prosesu preparasaun la'ó hela no sira rasik kestiona seriedade Governu no deputadu sira atu implementa duni programa desentralizasaun ka la'e tanba durante ne'e iha ona preparativu fazeadamente husi Governu anteriór, maibé ate agora laiha rezultadu.

Nia mós subliña tan hodi husu ba deputadu sira no Governante sira atu bele tau Dili ho estatutu ne'ebé iha tratamentu espesiál ho lei espesiál, labele hanesan podér lokál tanba konsidera Dili nu'udar kapitál nasaun nian. Administradór postu na'in 6 haforsa tan Prezidente Autoridade Munisipál nia deklarasaun katak sira prontu ona atu simu delagasaun podér ne'a hodi hakbesik governasaun ho povu no atu servi di'ak liutan.

Iha deputadu sira-nia intervensaun konkorda ho hanoin deputadu sira-nian no sei koko atu muda artigu balun ne'ebé mensiona iha projetu lei ida ne'e atu bele halo melloramentu nune'e, bele asegura implementasaun ne'ebé di'ak liután iha nia implementasaun iha baze.

Deputada Carmelita Moniz husu mós ba Ministru atu esplika di'ak ba Prezidente Repúblika kona-ba Artigu 33 no 34 Projetu Lei ne'e, ne'ebé Prezidente Repúblika veta ona hodi haree filafali ba lei Nu. 3/2016 kona-ba Estatutu Administradór Munisipál,

Autoridade Munisipál no Grupu Tékniku Interministeriál ba Desentralizasaun Administrativa ne'ebé sai nu'udar baze ba hatuur artigu rua ne'e tanba regula ona iha lei anteriór.

Alende ne'e, Komisaun A mós horseik aprova iha redasaun finál ba Lei Divizaun Administrasaun Teritoriál ne'ebé Parlamentu Nasionál aprova ona iha Segunda-feira lora 31 Maiu 2021 ho votu a favór 54, kontra 0 no abstensaun 0, ne'ebé iha nia rezultadu aprovasaun iha redasaun finál husi Komisaun A aprova ho votu a favór 9, kontra 0 no abstein 0.

Diskusaun ba audénsia pibliku ne'e iha sesaun dadersan prezide husi Presidente Komisaun A, distintu deputadu Joaquim dos Santos no iha sesaun lorokraik prezide husi Viseprezidente Komisaun A, distintu deputadu Francisco Vasconselhos.

2) 02 Juñu 2021

Komisaun A Parlamentu Nasionál iha 02 Juñu 2021, kontinua halo audénsia ho entidade relevante sira hodi rona sira-nia hanoin kona-ba Projetu Lei Podér Lokál no Desentralizasaun Administrativa no Lei Eleisaun Assembleia Munisipál.

Iha sesaun dadér nian Komisaun A realiza audénsia ho eis-membru Governu sira mak hanesan Eis-ministru Administrasaun Estatál sira mak hanesan Dr. Valentin Ximenes no vise-ministru Sr. Thomas Cabral no Sr. Abilio Jose Caetano. Iha sira-nia intervensaun hato'o mós sira nia perspetiva kona-ba importánsia husi Projetu Lei Podér Lokál no Desentralizasaun Administrativa no Lei Eleisaun Assembleia Munisipál. Sira konsidera prezensa lei ne'e importante tanba iha preparasaun kle'ur ona no to'o ona tempu atu Timor-Leste tenke halo ona desentralizasaun hodi hakbesik administrasaun públiku no dezvoltamentu ba povu no bele iha partisipasaun ativu liutan bainhira iha desentralizasaun.

Dr. Valente iha nia parte haktuir katak nia parte haree presiza hadi'a lei komplementár sira no mós presiza halo armonizasaun ba lei estruturante sira hodi dudu implementasaun Lei Podér Lokál ne'e, maibé sekuandu laiha delegasaun podér ba baze laiha efektu.

Entretantu husi akadémiku sira representa husi Universidade da Paz (UNPAZ) ne'ebé iha sira nia intevensaun sira konsidera *Undang-undang pelaksana* ne'ebé regula espesifikamente ba podér lokál nian tanba ne'e sira husu atu esbosu lei rua ne'e nia materia tenke temi ho klaru no espesifika ba se no oinsa no ezemplu hanesan relizaun ne'ebé sira iha Lei Podér Lokál no temi espesifikamente relizaun hirak ne'ebé estadu rekoñese tuir lei no kultura ka tradisaun ida ne'ebé Estadu konsidera iha lei tanba ne'e

labele loke espesu atu halo interpretasaun tuir ida-idak nia gosta iha nia implementasaun. Sira mós haktuir katak tanba nasaun ne'e unitáriu, direitu ba munisípiu sira atu iha emblema ka simbólu de'it la'ós iha bandeira rasik tanba ne'e sei fó konotasaun no forsa barak liu ba munisípiu sira atu uza nia podér ne'ebé liu no kontra prinsípiu nasaun unitária nian atu labele hakruk ba Governu sentrál no asuntu seluk mós relasiona relasaun externa tenke regula espesifiku.

Enkuantu hosi sociedade sivíl haktuir pontu prinsipál sira kona-ba esbosu lei rua ne'e seidauk iha uniformizasaun (*keseragaman*) iha hakerek mak hanesan iha artigu balun temi deputadu assembleia iha parte balun husi artigu balun temi de'it membru Assembleia Munisipál tanba ne'e tenke armoniza.

Iha provizaun pontu 2) Artigu 50 liga ho dezignasaun veteranu sira ne'ebé la liuhusi eleisaun no konsidera lei ne'e mokit iha inkluzo hodi la halo tratamentu igual, laiha provizaun ruma kona-ba partisipasaun ema ho defisiénsia sira no mós feto. Alende ne'e, impréstimu sira ne'ebé regula iha lei podér Lokál nia mekanizmu kontrolu ne'e la'ó oinsa.

Iha parte seluk mós sociedade sivíl husu atu eleisaun labele hala'ó simultaneamentu, maibé tenke haree no avalia munisípiu ne'ebé mak prontu ona atu realiza eleisaun no hala'ó eleisaun ba deputadu sira Assembleia Munisipál no Prezidente Autoridade Munisipál dala ida de'it.

3) 04 Juñu 2021

Reuniaun Komisaun A Parlamnetu Nasionál iha Sesta-feira 4 Juñu 2021, ho nia agenda reuniaun mak hanesan tuir mai ne'e:

- Aprovasaun relatóriu Paraser kona-ba Apresisaun Komisaun A ba PJP Nù.21/V (3.a) kona-ba Estatutu Majistradu Judisiál.

Kontinua husi relatóriu ne'e mensiona kona-ba importánsia husi estabese Estatutu Majistradu Judisiál no nia baze legál konstitusionál no mós rekomendasaun sira husi instituisaun relevante sira ne'ebé durante ne'e Komisaun halo ba no inspirasaun husi Estatutu Majistradu Judisiál Timor-Leste nian ne'e mai husi Estatutu Majistradu Judisiál Portugés nian.

Instituisaun Estadu no sociedade sivíl sira ne'ebé participa iha audénsia ba Estatutu Majistradu Judisiál nian mak:

- Ministériu Justisa

- Prezidente Tribunál Rekursu
- Prokuradór Jerál Repúblika
- Prezidente Asosiasaun Majistradu Judisiál Timor-Leste
- Eis-Ministra Justisa, Sra. Lucia Lobato
- Diretora JSMP ho ekipa

Rezultadu votasaun ba paraser PJJ Nú.21/V (3.a) kona-ba Estatutu Majistradu Judisiál, aprova ho votu sira afavór 8, kontra 0 no abstein 0.

Projetu Lei Estatutu Majistradu Judisiál tuir planu Komisaun A sei submete kedas ba plenária atu halo ajendamentu hodi aprova projetu refere iha jeneralidade.

4) 08 Juñu 2021

Iha 08 Juñu 2021, Komisaun A Parlamentu Nasionál halo audénsia ho Ministériu Administrasaun Estatal (MAE), Komisaun Nasionál Eleisaun no STAE kona-ba proposta Alterasaun ba Lei Órgaun Administrasaun Eleitoral no Proposta Alterasaun ba Lei Eleitoral Prezidensial.

Iha intervensaun Ministru MAE nian haktuir pontu importante kona-ba objetivu husi proposta alterasaun ne'e mak atu mellora serbisu eleitoral hodi hasa'e taxa partisipasaun públiku iha eleisaun sira tuir mai.

Artigu sira ne'ebé Governu propoin atu halo alterasaun iha proposta alterasaun ba Lei Órgaun Administrasaun Eleitoral mak:

- Artigu 8 kona-ba promove koordenasaun serbisu entre STAE ho CNE nian.
- Artigu 12 kona-ba jestaun no fiskalizaun ba BDRE, liuliu ligadu ho numeru 3 hodi hasai tiha knaar Komisaun Nasionál Eleisaun (CNE) nian iha parte ida ne'e nu'udar Órgaun supervizór ba aktu Eleitoral sira.
- Artigu 13 kona-ba konteúdu BDRE no fixeiru sira ba eleitór sira ne'ebé atu inklui tan pontu balun kona-ba número telemóvel no data biométriku iha resenseamentu eleitoral.
- Artigu 15 kona-ba kruzamentu ba dados sira no liuliu kona-ba eliminaun ba inskritu sira indevidas orijen atu halo tranferénsia.
- Artigu 17 kona-ba komunikasaun ba dados sira iha aumentu kona-ba kontrola no prevensaun ba brankeamentu ba kapitál no finansiamentu terorizmu no seluktan.
- Artigu 23 kona-ba promosaun ba inskrisaun ne'ebé propoin iha alterasaun ne'e tenke prova ho dokumentu sira ne'ebé hasai husi Estadu hanesan sertidaun RDTL, billete identidade no pasaporte hodi bele hetan asesu ba halo kartaun eleitoral.

Iha proposta alterasaun ba Lei Eleitorál Prezidensiál mak hanesan:

- Artigu 6 kona-ba kapasidade eleitorál
- Artigu 19 kona-ba sorteu kandidatura
- Artigu 31 kona-ba sentru votasaun
- Artigu 32 kona-ba oráriu sira funsionamentu sentru votasaun
- Artigu 36 kona-ba direitu ba votante sira
- Artigu 39 kona-ba identifikasaun eleitór ne'ebé iha aumentu kona-ba votasaun paralelu ba ema sira ne'ebé labele vota tuir sira nia área jeográfika.
- Artigu 68 kona-ba observadór nasionaál no internasionál ba eleisaun nian ne'ebé iha aumenta tan fraze ida kona-ba fiskalizasaun.

Entretantu iha apresentasaun husi CNE ho STAE konsidera alterasaun ne'e importante atu halo mundasa balun ne'ebé tuir tékniku CNE nian no STAE enfrenta no ida ne'e mak lori mai iha ne'e liuhusi proposta Governu propoin atu halo alterasaun ba artigu hirak ne'ebé mensiona iha proposta proposta Alterasaun ba Lei Órgaun Administrasaun Eleitorál no proposta alterasaun ba Lei Eleitorál Prezidensiál. Sira haktuir katak votasaun paralelu nu'udar meu ida ne'e di'ak atu evita ema barak la partisipa iha votasaun bainhira sira laiha tempu atu fila ba sira-nia área jeográfika ne'ebé lei regula ba.

CNE no STAE mós subliña atu kria mós artigu ruma hodi obriga comunidade sira partisipa iha eleisaun tuir prosedimentu sira ne'ebé iha hodi aseguira partisipasaun públiku iha prosesu demokrátiku no fó sansaun ba sira ne'ebé la partisipa iha eleisaun.

Iha intervensaun deputadu sira husu barak liu kona-ba konsidera proposta ne'e tenke diskute ho kle'an atu nune'e bele hamósu tan possibilidade hodi halo alterasaun ba artigu seluk, maibé sira nia pensamentu hanesan ho Governu, CNE no STAE katak alterasaun ne'e atu fasilita di'ak liután prosesu votasaun sira hodi bele hasa'e taxa partisipasaun. Sira mós ható'o sira-nia preokupasaun atu diskute kle'an kona-ba votasaun paralelu nian tuir proposta Governu no mós bele kria mekanizmu seluk ne'ebé apropiadu liu atu bele fasilita populasaun ho fasil atu halo asesu ba iha sentru votasaun ne'ebé sira besik ba.

5) 09 Juñu 2021

Iha 09 Juñu 2021, Komisaun A Parlamentu Nasionál continua halo audénsia ho eis Ministru Administrasaun Estatal Sr. Valentim Ximenes, Sr. Thomas do Rozario Cabral no Dr. Abilo Caetano hodi ko'alia kona-ba alterasaun ba Lei Nu.06/2016 kona-ba Resenseamentu Eleitorál no alterasaun ba Lei Nu.4/2017/ Lei Nu.7/2006 kona-ba Eleisaun Prezidensiál.

Audénsia ne'e reprezide husi Viseprezidente Komisaun A, distintu deputadu Francisco Vasconselhos no iha nia abertura introduz kona-ba objetivu prinsipál husi audénsia ne'e mak atu rona opiniaun eis-membru Governu sira-nia prespetiva kona-ba alterasaun ba lei rua ne'e atu bele enrikeza deputadu sira nia pensamentu ka hanoin iha diskusaun espesialidade.

Iha intervensaun Sr. Valentim Ximenes nian konsidera alterasaun ne'e di'ak, maibé tenke haree mós lei oan sira ne'ebé Governu dekreta ona no mós rezolusaun sira ne'e atu labele iha sobre pozisaun entre lei sira ne'e tanba ne'e nia sujere atu iha armonizasaun bainhira Parlamentu Nasionál konsege halo alterasaun ba lei rua ne'e.

Nia mós subliña kona-ba votasaun paralelu ne'ebé tuir nia di'ak, maibé presiza diskute kle'an hodi haree nia apliksaun iha nasaun balun hanesan Brazil nian ne'ebé tuir nia ne'e so aplika iha votasaun elektrónika no tanba ne'e ho difikultade internet ne'ebé ohin loron Timor-Leste enfrenta ita bele iha problema kona-ba ida ne'e. Nia mós haktuir katak bele mós aplika votasaun antes ba ema sira ne'ebé okupadu hanesan mós iha Portugal, maibé ne'e tenke vota iha sistema elektrónika nian.

Intervensaun Sr. Thomas do Rozario Cabral nian haktuir ba artigu sira ne'ebé nia konsidera sei ámbigu no bele mosu konfuzsaun nune'e mós kontra Konstituisaun mak artigu sira hanesan tuir mai ne'e:

Artigu iha Lei Eleitorál nian mak:

- Artigu 19 kona-ba admisaun ba kandidatura sira tuir nia mantein artigu anteriór proposta alterasaun número 6 no 7 kona-ba hodi tau fali STAE koadjuva fali serbisu Supremu Tribunál Justisa nian iha verifikasaun dados sira relasiona ho dokumentu admisaun ba kandidatura ida nian.
- Artigu 31 kona-ba sentru votasaun no Artigu 32 halo konfuzsaun no se bele mantein artigu anteriór.
- Artigu 36 kona-ba direitu ba votante sira iha número 7 nian ne'ebé ko'alia kona-ba votasaun paralelu ida ne'e ba estudante sira no pasiente sira tuir nia katak ne'e lalika altera ida ne'e tanba ita nia lei dehan vota tuir unidade jeografia no tanba ne'e tenke kumpri no babain sira tenke komunika ho STAE atu halo atualizasaun baze dados no nia xave mak hasai tiha de'it rekomendasaun husi xefe suku antesidente nian rekomendasaun nu'udar kritériu ba muda kartaun eleitorál ne'e atu bele fasilita sira partisipa iha eleisaun.
- Artigu 39 kona-ba identifikaun eleitór ne'ebé iha aumenta tan kona-ba votasaun paralelu ba ema sira ne'ebé labele vota tuir sira nia área jeográfika.
- Artigu 40 kona-ba lokál votasaun nian alende tuir suku ne'ebé kartaun eleitorál ne'e mensiona ba, maibé iha votasaun paralelu ne'ebé fó hela dalan ba sira atu

vota iha fatin ne'ebé de'it no ida ne'e bele hamosu problema iha eleisaun munisipál nian

- Artigu 68 kona-ba observadór nasionál no internasionál ba eleisaun nian ne'ebé iha aumenta tan fraze ida kona-ba fiskalizaun, tuir nia labele iha tanba observadór ne'e nia kompeténsia atu akompañia la'os fiskaliza no kompeténsia atu fiskaliza ne'e so fiskais de'it.

Kona-ba Lei Eleitorál nian nia parte haktuir katak:

- Labele muda Artigu 12 tanba ne'e mak mandatu konstitusionál fó ba CNE nu'udar órgaun supervizaun ba serbisu STAE nian.
- Númeru telefone no dadus biométriku tuir nia provizaun alinea i) & k) pontu 1) Artigu 13 kontra Lei Penál ne'ebé liga ho ema nia privasidade no labele tau ida.
- Artigu 17 kona-ba kontrolu brankeamentu ba kapitál no finansiamentu terorizmu ne'e Lei Brankeamentu regula ona no se mak resposabiliza ba ida ne'e mak Banku Sentrá no PCIC. Tanba ne'e nia parte husu lalika tau artigu ida ne'e tanba sei hamosu sobrepozisaun de'it iha serbisu ne'ebé tuir loloos instituisaun seluk halo tiha ona durante ne'e.

Iha nia rekomendasaun sujere atu altera de'it rekomendasaun husi xefe suku nian bainhira atu muda kartaun eleitorál hodi labele difikulta comunidade ka votante sira ba mai halo karta rekomendasaun. Nia mós husu atu aumenta tan estasaun votu ka sentru votasaun ho barak ne'ebé prevee ho númeru votasaun ne'ebé atinje rihun 5,000 bele instala sentru votasaun ida ho nia estasaun votu ne'ebé bele abranje ba 4 ka 5.

Alende ne'e nia haktuir tan katak presiza haree atu mantein resensiamentu obrigatóriu se la'e bele hamenus taxa partisipasaun iha eleisaun sira tuir mai inklui mós bele fó multa ba hirak ne'ebé la kuida kartaun eleitorál tenke iha sasaun.

Entretantu iha apresentasaun Dr. Abílio José Caetano reforsa de'it saida mak eis membru Governu na'in rua ne'e hato'o tiha ona no nia akresenta tan sobre subsídiu ba funsionáriu hirak ne'ebé envolve iha ekipa preparasaun ba eleisaun nian atu define didi'ak iha Lei Eleitorál hodi nune'e labele hamosu konfuzsaun entre sira ne'ebé tenke hetan direitu ida ne'e no sira ne'ebé la'e.

Deputadu sira iha sira-nia intervensaun apresia tebes ho hanoin sira ne'ebé eis-mbruu Governu na'in tolu ne'e hato'o no tanba informasaun sira ne'e útil tebes atu enrikeza deputadu sira hodi diskuti kle'an liutan proposta lei rua ne'e iha diskusaun espesializada.

6) 10 Juñu 2021

Reuniaun Komisaun A Parlamentu Nasionál iha 10 Juñu 2021, ho agenda mak hanesan:

- Apresisaun ba relatóriu paraser ba Projetu Lei Podér Lokál no Desentralizasaun Administrativa.
- Apresisaun ba relatóriu Projetu Lei Assembleia Munisipál.

Relatóriu paraser ba Projetu Lei Podér Lokál no Desentralizasaun Administrativa

Iha apresiasaun ba relatóriu paraser ba Projetu Lei Podér Lokál no Desentralizasaun Administrativa, ne'ebé apresenta husi deputadu relatór Sr. Francisco Vasconselhos hato'o konkluzaan ho nia rekomendasaun sira husi rezultadu audénsia ho entidade sira durante ne'e kona-ba Projetu Lei Podér Lokál no Desentralizasaun Administrativa mak hanesan tuir mai ne'e:

- Presiza haree filafali prinsípiu sira konstitusionál nian antes prevee kona-ba órgaun sira podér lokál nian.
- Presiza haree filafali hodi halo armonizasaun ba Lei no dekretu Lei inklui rezolusuan ezisténsia sira ne'ebé vinkuladu ona hodi hadia bainhira lei ne'e ejiste hodi labele hamosu sobrepozisaun iha nia implementsaun.
- Presiza halo analiza no diskute kle'an kona-ba kandidatura husi grupu independente iha eleisaun Prezidente autoridade munisipál ho nune'e labele lakon mandatu bainhira la hetan apoiu husi deputadu assembleia munisipál.
- Presiza hadia filafali esbosu Lei ne'e nia ho koherensia no sistemátika tuir esntrutura ne'ebé estabelese ona iha Parlamentu Nasionál.
- Governu depoisde aprova lei ne'e tenke apresenta mós lei kona-ba Finansa lokal nian no definisaun limite fronteira kada munisípiu nian atu bele tama iha vigór iha data hanesan hodi bele aplika ho Lei Podér Lokál nian.

Rezultadu aprovasaun relatóriu paraser ba Projetu Lei Podér Lokál no Desentralizasaun Administrativa pasa ho votu afavór 8, kontra 0 no abstein 0.

Relatóriu paraser ba Projetu Lei Eleitorál Assembleia Munisipál

Iha apresiaun ba relatóriu paraser ba projetu Lei Eleitorál Assembleia Munisipál ne'ebé apresenta husi deputadu relatór Sr. Francisco Vasconselhos hato'o konkluzaan ho nia rekomendasaun sira husi rezultadu audénsia ho entidade sira durante ne'e mak hanesan tuir mai ne'e:

- Presiza haree filafali prinsípiu konstitusionál sira nian antes konstitui órgaun sira podér lokál nian.

- Presiza haree filafali prinsípiu ka parámetru sira Konstituisaun nian kona-ba kampañia eleitorál no konversaun votu sira inklui mandatu.
- Presiza iha armonizasaun ba lei ezistente sira hodi labele hamosu sobrepozisaun bainhira lei ne'e tama iha vigór.
- Presiza iha regra espesífiku atu asegura kandidatu sira husi grupu independente nian ba kandidatura líder autarkia sira.
- Tenke halo analiza ba koerensia no sistemátika atu estrutura lei ne'e tuir estrutura ne'ebé estabelese ona iha Parlamentu Nasionál.
- Lei ne'e tenke abranje hotu ba regula aspetu fundamentál sira kona-ba aktu eleitorál munisipál.

Rezultadu aprovasaun relatóriu paraser ba Projetu Lei Eleitorál Assembleia Munisipál pasa ho votu afavór 8, kontra 0 no abstein 0.

Esbosu lei rua ne'e Komisaun A konsege halo audénsia públiku ho entidade públiku, sociedade sivíl no autoridade lokál sira mak hanesan Ministru Administrsaun Estatal, STAE, CNE, FONGTIL, Autoridade Lokál munisípiu Covalima, Ermera, Aileu, Likisá, Bobonaro no Dili.

7) 16 Juñu 2021

Reuniaun Komisaun A Parlamentu Nasionál iha 16 Juñu 2021, halo apresiasaun ba relatóriu pareser tolu mak hanesan:

- Relatóriu pareser kona ba PPL Nú. 30/V (3ª) - alterasaun datoluk ba Lei Nú. 5/2005 kona-ba Órgaun Administrasaun Eleitorál no PPL Nú. 31/V(3ª) - alterasaun dahuluk ba Lei Nú.6/2016 kona-ba Resenseamentu Eleitorál no PPL Nú.33/V(3ª) - alterasaun daneen ba Lei Nú.7/2006 kona-ba Eleisaun ba Prezidente Repúblika.

Iha apresiasaun ne'e, Komisaun A halo de'it apresiasaun no observasaun ba relatóriu paraser iha termu estrutura no téknika.

Aprovasaun ba relatóriu tolu ne'e ho votu afavór 8, abstensaun 1 no kontra 0.

8) 23 to'o 26 Juñu 2021

Atividade sira Komisaun A Parlamentu Nasionál hahú husi 23 to'o 26 Juñu iha Munisípiu Aileu. Atividade iha Aileu ne'e hodi halo diskusaun iha especialidade ba *Proposta de Lei Nú.30/V (3ª) - Terceira Alteração à Lei Nú.5/2006, de 28 de dezembro, sobre Órgãos da Administração Eleitoral, Proposta de Lei Nú.31/V (3ª) - Primeira Alteração à Lei Nú.6/2016, de 25 de maio, Lei do Recenseamento Eleitoral,*

Proposta de Lei 33/V (3ª) - Sexta Alteração à Lei Nú.7/2006, de 28 de dezembro, Lei Eleitoral para o Presidente da República.

Iha 23 Juñu 2021, Komisaun A Parlamentu Nasionál halo diskusaun no aprovasaun iha espesialidade kona-ba *Proposta Lei Nú.30/V (3ª) - Terceira Alteração à Lei Nú.5/2006, de 28 de dezembro, sobre Orgãos da Administração Eleitoral*, iha Munisípiu Aileu.

Iha diskusaun ne'e foka liu ba asuntu importante sira mak hanesan kompeténsia STAE nian no iha possibilidade atu halo pareser tékniku no jurídiku ba Governu atu halo regulamentu ou dekretu lei, nune'e Governu bele implementa.

Konkluzau no Rekomendasaun

Parlamentu Nasionál funsiona normál no produtivu tebes mezmuke iha situasaun Estadu Emerjénsia, serka sanitária iha Dili no diverjénsia política entre partidu opozisaun no partidu sira Governu nian.

Komisaun Especializada Permanente sira kontinua la'ó ho normal, partikularmente Komisaun A kontinua hala'ó sira-nia atividade ho nomál hodi halo audénsia ho entidade relavante sira kona-ba projetu no proposta lei sira ne'ebé Meza Parlamentu baixa ba Komisaun atu halo apresiasaun no halo mós aprovasaun nia relatóriu paraser sira.

Nune'e, JSMP rekomenda atu Parlamentu Nasionál kontinua funsiona hanesan ne'e no hala'ó nia knaar konstitusionál sira ho di'ak no efetivu liu iha futuru hodi hases tiha interese partidária no tau aas interese nasionál hodi bele fokus ba diskute, aprova no finaliza lei importante sira.